

# Fasnacht 2009



## Dr Uurknall

D'Menschhait duet scho lang tiftle, brööble und sinniere duet wisseschafftle, teschte, überlege und schtudiere me weiss, es isch fascht unmeeglig, e ganz e schwierige Fall aber si wänn's ändlig wisse wie's gsi isch mit däm Uurknall.

Wie sin ägscht Galaxie, Planete und au unseri Wält entschtande e kai Birger hett das bis jetzt je begriffe und verschtande isch vor 13 Milliarde Joohr wirgglig mit eme gwaltige Uurknall s'Univärsum entschtande und da dermit unser g'samt Wältall?

Damit Kosmologe an unbekannte Energie kenne umestudiere Wisseschafftler dunggli Leecher, wie ächt noochesimuliere wird in Gänf en Uurknall-Maschine baut, fir e huffe Gäld do dermit will me gnau erforsche, d'Entstehig vo der Wält.

Uf e erschte Bligg teents sicher, aifach und fascht banal me jaggt Atomkärn dure 27 Kilometer lange Ringkanal denn losst me gege die Atom frontal Protone entgege pralle und wenn's denn gleepft und däscht duets de Physiker gfalle.

So hofft me kinschtlig kenne schwarzi Leecher z'produziere und dr Uurknall und d'Entstehig vo der Wält noochesimuliere es isch denn nimm wyt zem's denn z'bewyysse, das isch fatal bygott dass die ganzi Wält nid erschaffe werde isch vo irgend eme Gott.

Aber das wär doch im Grund gno gar nid unbedingt schlächt es miesste Gwissy yygseh, dass das wo si maine nid immer isch rächt die ganzi Gschicht über d'Entstehig vo unserer Ärde miesst in unzählige Biecher neu niedergeschriben wärde.

Vielleicht gits denn weniger Fanatiker wo fir irgend e Gott und Gäld umeterrorischte, sich bekriege und töte uf däre Wält sich fir e sälschternannte Messias gegesytyg d'Keepf yschleen die miesste denn ygseh dass si Unrächt hän - die bleede Gleen.

Au d'Gschicht vo Adam und Eva wo en Epfel dien ässe so s'Paradies uf Ärde vermyyse kasch grad vergässe und der Christof Blocher merrgt ändlig dass är sott au ygseh dass är nid verwandt isch mit eme liebe Gott.

Mir kennte denn au Politiker wo uns nid dien gfalle aifach lo verschwinde in de schwarze Leecher-Falle der Erscht wo miessti drin verschwinde, das wänn mir gseh wär der Ueli Muurer mit der gesamte SVP.

Au der George Bush dä eländi Rambo und Ummekrieger griegt zem Schluss no e guete Root vo uns Runzlebieger syg muetig und los di doch aimol nid lo lumpe und due ganz schnäll in das schwarzi Leechli gumpe.

Denn git's no e baar, das liggt uf der Hand die hän scho jetzt vor em Kopf e schwarzi Wand die maine si hän d'Wält erschaffe und das gäbi Boni mir dängge do speziell an Brunner Toni.

Dä Forschigs „Large Hadron Collidier" in Gänf isch im Grund gno intressant und wirgglig kai Sämf aber es isch wie immer in unserem Land Anggschthase mache berails heftig Widerstand.

Si maine dä Ringkanal in Gänf isch um ainiges z'lang das git nägschtens denn der ächti Wältuntergang die Teschts sinn drum gfährlig und im Grund gno e Flop drum fordere die Fanatiker e sofortige Stop.

Und so hänn d'Medie wieder e huffe z'schryybe kenne über dr Untergang brichte und übertryybe uns s'Aend vo der Wält akindige uf de Titelsyte isch es jetzt denn ägscht verby mit de scheene Zyte?

Git's bald näbe der Krise vo Wirtschaft und Bangge Firmeschliessige, Inflation und Abwärtig vom Frangge zue allem libel no «La crise de Geneve» mir sage doo derzue numme «ça nous nerve»

Mir hänn soo scho an andere huffe Sorge z'byssse und wänn vo schwarze Leecher gar nyt wysse blooset uns mit so komplizierte Theorie in d'Kappe kumm, mir wänn lieber zämme ain go schnappe.

Mir glaube unsere Wunsch isch nid dernäbe leehn uns doch aifach uf däre scheene Wält läbe in Friede zämme sy und Fasnacht mache und über schwarzi Leecher ganz aifach lache.

D'Ladäärne-Uusstellig uff em Münsterplatz und d'Waage- und Reggwisytyte-Uusstellig bi dr Kasäärne sin offe vom Fasnachtmäntig znacht bis am Mittwucho demorge. Deert kaa me au alli Zeedel und Schnitzelbängg, Blaggette und dr Rädäbängg kaufe.